

Date – 24/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Sumdawnna kawnga hma la leh mahni kutkawiha sumdawn lama tuimite puihna tur Mizoram Rahbi 5.0 chu Chief Secretary Dr. Renu Sharma-in a hawng.
2. NHM Employees Union Mizoram (NEUM) chuan Mizoram sorkara an thil phut hrang hrang te tih hlawhtlin a nih loh chuan lungawi lohna lantir an tum tih an puang.
3. External Affairs Ministry chuan Prime Minister Narendra Modia'n hlawhtling takin US a tlawh a ti.
4. Israel thlawhnaten Lebanon an beihnaah mi 274 aia tlem lo an thi.



MIZORAM RAHBI 5.0

Planning & Programme Implementation Department hnuai Mizoram Startup Mission (MSUM) kaltlanga buatsaih tur, Mizoram Rahbi 5.0 chu Chief Secretary Dr. Renu Sharma-in nimin khan a hawng.

Hawna inkhawm MINECO-a a pisaa neiah Mizoram Startup Mission (MSUM), Governing Board Chairperson Dr. Renu Sharma chuan Mizoram Rahbi 5.0 kalpui tur chu Sawrkar hmalakna pawimawh tak, sundawnna kawnga chin dan thar leh dangdai deuh ngaihtuah chhuaka, eizawnna ngelnghet siam bakah state sum leh pai dinhmun siamthat kawnga hmalakna a nih thu a sawi a. Sundawnna leh eizawnna kawnga bultan tum, hmabak eng takte chawikan nana ruahman a nih thu sawiin, "He intihsiaknaah hian Mizoram mi leh sa, tunhnaia sundawnna kawnga hma la leh helama tuimite an tel thei dawn a, hemi kaltlanga titha thlan chhuahte chuan cheng nuai 7.5 thleng tanpuina an dawng thei dawn a ni," a ti a. Mizoram Rahbi 5.0 chu Mizoram tana sundawnna kawnga hmalakna thar, viak tha leh hlawhtling a nih ngei theih nana ngaihluva a tam thei ang ber tel tum turin mipuite a sawm a ni.

Mizoram Rahbi 5.0 hawna hunah hian Planning & Programme Implementation (P&PI) Department Secretary Pu Lalmalsawma Pachuau leh Official dangte an tel a ni.

Mizoram Rahbi 5.0 hian Mizoram chu a chhunga chengte leh chin dan thar, danglam bik hmangeta mahni kutke ngeia ding thei tura hlankai chu a tum bulpui ber a ni a. Hei hian intihsiakna mai ni lo, sundawnna kawnga inhrilhhriatna, sumdawng dangte nena inthlunzawmna, a hralhna tur ngaihtuah bakah pawimawh dangte a huam tel a ni.

Ruahman dan chuan Mizoram Rahbi 5.0 a tel duh tan dilna hi October ni 31 thleng hawn a ni dawn a. Hrechiang duh tan Mizoram Startup Hub, Planning & Programme Implementation (P&PI) Department, Raj Bhavan Gate ep-ah zawhfiah theih a ni a. Dilna hi Office-ah leh MSUM website www.startupmizoram.com ah ngaihven theih a ni a, Office hun chhungin theih tur a ni ang.



AGRI MINISTER

Agriculture Minister Pu PC Vanlalruata'n kumina Kolasib leh Mamit a buh thar lei turin OmOm Rice Mill nen inremna ziak turin hmalak mek a ni a ti

Minister chuan Kolasib leh Mamit Buhhum chu a enchhin nan sorkar in a lei anga, support price pawh sorkarin a tum dawn tih a sawi a. OmOm Rice Mill in lei turin ruahmanna an siam bakah sawrkarin cheng 30 in buhhum kg khat a leiin support price a pe dawn tih a sawi.

Minister chuan Bana Kaih Policy-ah thlai thar hralhna tur an ngaipawimawh ber a ti a, thlai thar Wholesale a zawrhna tur Building sak nan hmun hnih an nei tawh a, ZPM Sorkarah Mizoram in hmel thar a hmuh ngei a beisei tih sawiin Hand Holding Policy in a tum ber chu hmasawna tluantling leh nghet a ni a, an ngaih pawimawh ber chu thlai thar hralhna Market a ni tih a sawi.

Minister chuan Aizawl khawpui chhung hmun 4-ah thlai thar hralhna tur Wholesale Market an sa dawn a ti a, hmun 2-ah wholesale market sakna tur sum cheng veibelchhe 10-an dawng tawh tih sawiin a hmuhma tur Sihphir leh Melthumahte an en tawh tih a sawi.



SAMPOORNATA ABHIYAN

Ram chhunga District leh Block hnufualte chhawmdawl nana sawrkar laipuiin a ruahman - Sampoonata Abhiyan chu Mizorama District pathum ami ten an chhawr theih nan inhrilh kawngah chak taka hmalak mek a ni.

He hmalakna hi July thla atang khan Mizorama District pathum – Lunglei, Saitual leh Mamit District-a block chhungah beihpui thlakin hmalakna atana thlan chhuah Block pathum – Lungsen, Reiek leh Ngopa RD Block-a mipui vantlang tana hmasawna leh changkan theihna tur zaa za thlen theihtir tum a ni a, tun thla thleng awh a nih avangin Line dept. hrang hrang ten theihtawpin hna an thawk a ni.

He hmalakna chungchang a sawinaah Mamit DC Pu Jacob Lalawmpuia chuan zunthlum leh BP sang vanga thihna ram chhungah a tam hle a, Sampoonata Abhiyan hnuaiiah kum 30 chung lam zawng zawng endik vek an nih chuan mahni dinhmun inhriain hmasawna a thlen dawn a ni, a ti a. Kawng hrang hrangah hmasawna tuantling a awm theih nan nasa zawka hmalakna kalpui a tul thu pawh sawiin, chumi tur chuan inpekna thuk zawk nen thawhhona tha neih a tul a ni, a ti.

Sawrkar laipui (NITI Aayog) hmalakna, Sampoonata Abhiyan hnuaiiah hian thla 3 chhungin hriselna lam kaihhnawih, naupai hriselna endik, naupaiin chaw tha a dawn dan, kum 30 chung lam BP leh zunthlum enfiah, Agriculture Department hnuaiia Soil Health Card siam leh Self Help Group ten tanpuina an dawn dan te chu tehnaa hmangin hma lak a ni.

◇◇◇◇

SAITUAL MISSION SHAKTI

Saitual DC Conference Hall-ah District Level Implementing Committee on Mission Shakti hawn a ni a, DC Dr Lalngura Tlau hova a hawna nimina neihah Action Plan 2024-2025 pawm a ni.

Dr Lalngura tlau chuan Mission Shakti hawn a ni ta chu Saitual District tan bung thar kaina a ni tih sawiin naupang leh hmeichhia an him a, an changkan hian ram a changkang thin a ni a ti. Chairman chuan DHEW thawktute chungah lawmthu sawiin thil reng reng inthanna chu a ropui ngai lova, mahni insit lova theihtawp chhuah a, saitual distrit tan chhenfakawm leh hmeichhiate tan kawng eng siam ngei turin duhsakna a hlan zui a, hun reilote chhungin activity engemawzat an nei thei chu an thawhrinnaah lawmawm a tih thu a sawi bawk.

◇◇◇◇

NHM

NHM Employees Union Mizoram (NEUM) chuan Mizoram sorkara an thil phut hrang hrang te tih hlawhtlin a nih loh chuan lungawi lohna lantir an tum tih an puang.

Hemi chungchanga thuchhuah an siamah NEUM chuan sorkar hmalakna an ngaichang dawn tih sawiin, hmalakna mumal a awm loh chuan September ni 26 atanga ni 28 chhungin Badge dum bela lungawi lohna lantir an tum a, hma an sawn lo a nih chuan an kal zel dan tur ngaihtuah a ni ang, an ti.

NEUM chuan Mizoram sawrkarin tun hnaia Centrally Sponsored Scheme hnuaiia thawkte hamthatna tur lehkhah a tichhuak chu lawmawm an ti a; hetih mek lai hian Health and Family Welfare Department hnuaiia hna nghet lak tur thenkhat - Health Worker, Staff Nurse, Laboratory Technician, X-ray Technician leh a dangte ruahmanna leh rawtna an siamah NHM hnuaiia staff-te tana hamthatna awm thei lo zawnga mi thar vek lak theih tur anga hmalakna a kal chu tha an ti lo a ni.

An thuchhuaha tarlan a nih dan chuan, Health Department hnuaiia regular post lak tur awm reng rengah The Government of Mizoram Regularization of Centrally Sponsored Scheme (CSS) Employees Scheme 2024 chu hman an duh tih an tarlang bawk.

◇◇◇◇

SUPPLY MINISTER

Food Civil Supplies & Consumer Affairs Minister Pu B. Lalchhanzova'n ration card var hmangte tana buhfai KG-a Rs 30 ni tawh tur chuan rualkhai leh felfai zawka a kal phah ngei a rin thu a sawi.

He thu hi nimina Targetted Public Distribution System (TPDS) hnuaiia beneficiary-te chanvo leh an harsatna chhawk zangkhah dan chungchang inhrilhriatna Vanapa Hall, Aizawla neih a hmanpui na ah sawiin Minister chuan mi tin te mahni zawn theuhah vantlang tana tangkaina nei thei vek an ni tih sawiin retailer-te chu sawrkarin an tanghma a ngai em em tih hria a, mipuite tana thahnemngai lehzual turin a fuih a. Ration card var hmangte tana buhfai KG-a Rs 30 ni tawh tur chuan Mizona thinlung chawk thovin, rualkhai leh felfai zawka an kal phah ngei a rin thu a sawi a, TPDS beneficiary-te thliar fel dan tur chungchangah pawh sawrkarin ngaihtuahna nasa tak a sen mek thu a tarlang bawk.

He hun, 'Awareness Campaign on TPDS beneficiaries' hi TPDS hnuaiia beneficiary-te chanvo leh an harsatna chhawk zangkhah dan kawnga inhrilhriatna a nih angin, Retailer leh Local Council-te puala buatsaih a ni a. Hei bakah hian NGO hrang hrang leh Community-based Organisations (CBOs) aiawh thahnem tak an tel bawk.

◇◇◇◇

PM IN US

External Affairs Ministry chuan Prime Minister Narendra Modia'n hlawhtling takin US a tlawh a ti. Nimina New York-a chanchinbumite a kawmnaah Foreign Secretary Vikram Misri chuan US a cham chhunga India mi chengte nen hun an hmang ho thei chuan Pu Modia inzawmna thuk tak a neihpui zia a

tilang a ti a. India mi US-a khawsa te chu ram pahnih inkar dawhzawmtu lei pawimawh tak an nih avangin Prime Minister pawhin a ngaipawimawh a ni a ti a.

Foreign Secretary hian PM Modia'n sawrkar hotu pawimawh hrang hrang a kawm chungchang a tarlang baw a. PM Modian Nepal ram hrutiteu, Kuwait Crown Prince te, Ukrainian President Zelensky leh Palestine President a hmuh thute sawiin heng ram hruaitute hnenah hian India ngaihda leh beiseina chungchang te a sawilang a ni ti a. Palestine buaina chungchangah Pu Modia chuan a tul anga chhawmdawl zel a intiam thu sawiin remna siam kawngah a tih tur tih chhunzawm zel a tiam niin Foreign Secretary chuan a sawi baw a ni.



ISRAEL STRIKES IN LEBANON

Israel thlawhnaten Lebanon an beihnaah mi 274 aia tlem lo an thi a. Mi 1000 chuangin hliam an tuar. Lebanon Health Ministry sawidanin mitthi leh hliam zingah hian naupang, hmeichhia leh damdawi lam thiamte an tel a. Israel sipaite hian khawpui engemawzat an bitum a. Hetihlai hian Israel sipaite chuan tum bik 800 chuang Lebanon ah hian an beih thu an sawi a. Heng hmunte hi Iran thlawp Hezbollah sipaiten ralthuam chhawkkhawlna atana an hmanna hmunte an ni an ti.



PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

